

旗軍志

清 遼左金德純素公著

我 國家自

太祖武皇帝創業以上聖起東垂用兵威兼并傍小國  
及

太宗文皇帝撫有全遼臣服朝鮮百度漸舉爰立八旗  
曰正黃鑲黃正白鑲白正紅鑲紅正藍鑲藍每旗析三  
部以從龍部落及傍小國臣順者子孫臣民爲滿洲諸  
漠北引弓之民景化內徙者別爲蒙古而以遼人故明

指揮使子孫他中朝將眾來降及所掠得別隸爲漢軍各簡其部中賢才用爲大將將其眾階正一品曰都統都統之下副將二員曰副都統正二品參領五員正三品隸于都統副都統佐領正四品驍騎校正六品每一佐領置一驍騎校卒五十名無常員惟人數之多少而置焉謂之馬軍營滿洲蒙古又選馬軍精壯便騎射者爲一軍置大將一員正一品位視都統而稍貴其選使統四旗曰護軍都統每旗復置大將一員正二品位視副都統而稍貴曰護軍統領而統五護軍參領正三品

護軍校尉正六品亦因人卒之多少而置員如佐領驍騎校統騎二十而總號其軍曰護軍營更選護軍尤技精力勇者爲先鋒每旗先鋒參領五員正三品將騎多少無恆數亦隸于護軍都統統領曰先鋒營平時各統其軍教以作坐進退遇有事則各帥其卒執戈矛爲王先驅居則卒習其將如左右手之于臂將習大將大將一指揮可知諸將之才否故無有庸劣之將疲老之卒有事征伐事已而歸還其卒于天子大將不得私一人一卒故無有驕悍不可制之大將其制上下維持最爲

周密後軍士立功者眾諸官爵不足以充賞爰置世職  
準方武功爵以待破軍殺將保城拓境者初半階曰拖  
沙喇哈番次正階曰拜他喇布勒哈番次二次三次四  
曰一等二等三等阿達哈哈番次五次六次七曰阿思  
哈呢哈番次八次九次十精奇呢哈番分等亦如之上  
此則伯三等侯三等公三等爲九階共階十九虛王國  
不與酬功而公侯伯非出人主意亦不得擅請封著爲  
制凡選卒伍之法一佐領壯丁二百名以五尺之表度  
人如表能勝騎射充壯丁入籍至六十而免籍有甲卒

缺出卽以充選其餘爲餘丁不任征伐國有大役卽以  
役之及

世祖章皇帝卽位明綱失御李自成覆京師

世祖提一旅自東垂龍驤虎躍踣流寇于山海入宅京  
師臣一海內其閒他小醜據險稱戈次第鏟削芟夷天  
威所暨無不如意迨四海旣清鑑往古太平旣久兵驕  
而弱不識金鼓之音戰陣之法命兵部尙書于春二月  
角射而賞罰之前期都統副都統率其屬及部卒習射  
于國郊日一往數日兵部尙書臨視而第其上一卒

步射十矢馬射五矢步射中的七馬射中的三爲上等賞以弓一矢十白金布帛各七步射中五馬射中二爲中等賞白金布帛各五無弓矢步射中三馬射中一爲下等無所賞馬步射或不中或兩俱不中則答之一佐領受答之卒過十人則佐領有不善教練之罰至奪俸一旗滿六百人則都統副都統之罰亦如之護軍先鋒營閱射亦如馬軍之制歲八月教砲于拱極城先期八旗之將率其佐及步卒分二番上番月初往月中下番往代至月終卒事依山立十二營每營一大將一裨

將晨出至砲所令每砲發三四出勒兵爲方陣進數十步退爲長陣首尾彌縫結圓陣歸營聚眾申令之歸奏異事至十月大閱甲冑軍器八旗各列隊伍于各門外大將及諸裨將皆被甲上馬諸軍士嚴裝手矛立旗下候兵部尙書閱其優劣兵部尙書至諸將馳馬迎數百步前導至大將所下馬升座復呈弓矢刀劍以次而閱善則已否則有罰卒事上奏亦如閱砲

世祖于軍政講之既精教之有素故所向無前平時賞賜優餼制產一壯丁予田三十畝以其所入爲馬芻菽

之費一兵有三壯丁將不下十壯丁大將則壯丁數十連田數頃故八旗將佐居家皆彈箏擊筑衣文繡策肥日從賓客子弟飲雖一卒之享皆兼人之奉又設官學選八旗俊秀一佐領一人學于其中三年比其藝而升進之遇郎中員外郎主事缺選于佐領世職習文藝達治體者充之謂之保選故順治閒一時得人八旗爲盛煌煌乎皆幹國材也今

上卽位承

世祖之法八年逆藩吳三桂據雲南反後耿精忠叛于

福建尙之信叛于廣州與三桂連衡

上命將四出次第削平用都統趙璟議以安不忘危每歲秋冬較獵于塞上甲卒將佐分番從駕較獵暗寓營陣之法後復允左僉都御史陳汝器請增火器一營每旗選馬軍精健者五人拔二一佐領得二十人置操縱尉二員正五品副尉二員正六品一旗置參領一員正四品統領一員正三品四旗置副都統四員都統一員卽命馬軍都統副都統兼任其事平時月四五出練于郊冬至

上親閱于天壽山八旗軍爲三列步居前銃中列左右翼以砲騎殿鳴金陣前移二十步擊鼓砲作復鳴金銃作進數十步陣開騎從中出策馬作窮追勢數百步歸陣如前鳴金步卒進如是者三卒事

天子頒諸軍牢醴三十四年上用火器軍踏厄魯得噶爾旦于厄魯倫河三十五年遂并馬軍歸于火器營而諸營仍其舊焉

論曰從古軍政大都善于始墮于末如周之卒乘其始因民爲軍征行不覺其擾後東遷不振敗于鄭敗于戎

晉作五軍非王朝之制至戰國蕩然矣漢南北軍強幹弱枝武帝窮兵召配天下閭里宣成以後反借用于四方唐府兵其始與周制暗合及天寶浸衰賈人子皆竄身其中安史亂後漸失河北此三朝者其遠百餘年近或數十年卽浸失制作之意况其始未善而繼之以怠乎較三朝以論春秋戰國之亂極矣生民朝不保暮然有抗命之諸侯無匹夫特起之禍周之制爲優 國家自

太祖以來至今垂百年軍政日修余從故老聞其始末

因著于篇爲旗軍志以備典籍之所未備焉



國家圖書館, NATIONAL CENTRAL LIBRARY, TAIWAN, R.O.C.